

Regional News Unit AIR Aizawl  
Monday, January 06, 2025  
Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Kum thar ni atanga Assam Rifles hovin Zokhawthar leh Khawmawi inkar inkalpawh an khuahkhirh zual tak avangin Myanmar atanga Zokhawthar khuaa sikul kilte dinhmun a chiang ta lo hle.
- Kuminah African Swine Fever (ASF), vawk pulhri avangin vawk thi leh suat a la awm lo.
- Prime Minister Narendra Modi-a'n vawiinah biakhmuhtheihna hmangin railway project chi hrang hrang a hawng dawn.
- US President Joe Biden-a'n America leh khawvel tana mi thawh-hlawk chungchuang mi 19 hnenah chawimawina "Presidential Medal of Freedom" a hlan.



### MYANMAR STUDENTS

Kum thar ni atanga Assam Rifles hovin Zokhawthar leh Khawmawi inkar inkalpawh an khuahkhirh zual tak avangin Myanmar atanga Zokhawthar khua a sikul kaite dinhmun a chiang ta lo hle.

Zokhawthar khawtlang hruaitute'n Akashvani Aizawl an hrilh danin Myanmar ram a buai avangin Tiau ral leh lam a Myanmar naupang 500 chuang zet chu Zokhawthar khua-ah sikul an lut a. Mizoram lama sikul rawn lutte hi primary school, middle school, high school leh higher secondary school zirlaite an ni a. Sikul kai hun lai chuan zingah ramri lei rawn kanin sikul an kal a, tlai sikul banah Myanmar lamah an haw pheih leh mai thin a ni. Zirlaite hi Khawmawi, Rihkhawdar leh a chheh vel khua atanga rawn kal an ni ber. Tun January ni 1 atanga Assam Rifles-te'n ramri a inkalpawh an khuahkhirh zual takah hian thlasik chawlh tawp, January ni 10 atanga Myanmar naupang sikul rawn kal turte dinhmun a chiang ta lo hle niin Zokhawthar khawtlang hruaitu pakhat chuan a sawi. Assam Rifles te hian Tiau lei a inkalpawhna bakah luh leh chhuahna atana hman rim deuh 4 dangah silai keng duty an dah mek bawk ni a thu dawn a ni.

Sikul academic session a la kal laklawh si a. Tun anga Assam Rifles hovin mi lut leh chhuak an khuahkhirh tak chiamah hian zirlaite tana ruahmanna bik engemaw a awm loh chuan an zirna-in a tuar ang tih a hlauhawm thu a sawi a. Mi 500 chuang zet nitin ramri lei kan tur an nih avangin ruahmanna fel tak siam a nih loh chuan harsatna namen lo an tawk thei niin an sawi a ni.

Nikum leh kum hmasa lama Mizoram dep Chin state a khaw thenkhat Myanmar indo thlawhnate'n an rawn bomb fo avang leh sipai sorkar dotu Chin pawlte'n Myanmar sipai hmun an lakna a inkahna nasa tak a awm thin avangin mi sang tel Mizoramah an rawn tlanchhia a. Tam tak an let leh chungin tharum thawhna a awm leh thin avangin an rawn tlanchhe leh thin a. An fate zirlai a bahlah an hlauh avangin nu leh pa tam takin Zokhawthar lamah an fate sikul an kaltir laklawh mek a ni.

Hetih lai hian Champhai Sub Headquarters YMA hruaitute chuan Zokhawthar leh Khawmawi inkalpawhna khar a nih hma hian tunhnai-ah raltlan chhungkaw 100 chuang an lo lut niin an sawi a. Raltlan lo lutte hi Falam khua leh a chhehvela Myanmar sipai leh Chin pawl hrang hrangte inkahna a nasat vang niin an sawi a. Champhai a relief camp a khah vek tawh avangin dah theih an ni tawh lova. Chu vangin chhung khat laina leh an hmelhriat tamna Champhai Kanan veng lamah an khawsa zui deuh ber niin an sawi. Tun hnai-ah hian Myanmar sipaite leh ‘mipui sipai’ tia an sawite hi Falam bakah Tedim leh Tonzang lamah an inkap mek niin an sawi bawka a ni.



#### ASF UPDATE

Kuminah African Swine Fever (ASF) vawk pulhri avangin vawk thi leh suat a la awm lo.

January ni 1 leh nimin thleng (ni 5 chhung) hian ASF vawk pulhri vanga vawk thi leh suat a la awm lova. Animal Husbandry & Veterinary department hotute’n an chhinchhiah dan chuan kum hlui 2024 February ni 9 a Champhai district Leithum khua a ASF vawk pulhri vei an finfiah atanga nikum chhung zawnga he vawk pulhri avanga vawk thi zat chu 14,950 a ni a. Vawk pulhri darh zel tur venna atan vawk 24,177 suat a ni bawka. Mizorama vawk pulhri leng hian thlasik intan November atang khan zia-awm lam a pan chhova, mimalin vawk tam tham an vulhna hmun pulhri-in a luh chilh avanga thi leh suat tam ni deuh a awm leh zauh thin chungin a zia-awm chho zel a. December thla khan thi leh suat a tlem tawh hle a ni.

March ni 21, 2021 khan Lunglei district a Lungsen khua-ah ASF vawk pulhri vei hi finfiah hmasak ber a ni a. Hemi atanga nikum thlenga he vawk pulhri avanga vawk thi zat chu 62,167 a tling tawh a. Kum 2021 khan vawk 33,417 thi-in kum 2022 khan 12,761 thi-in niklum khan 1,039 a thi leh bawka a ni. Vawk suat zat hi kum 4 chhung hian vawk 49,267 suat a ni a. ASF vawk pulhri avanga Mizoram vawk a chan zawng zawng hi nuai 1, sing 1, sang 1 leh 434 zet a ni.



#### VC/LC POLLS

Thla leh ni 19-a village council leh local council term tawp hma a inthlang thei tura inbuatsaihna-ah VC leh LC electoral roll chu tun thla ni 8 (Nilaini) khian tihchhuah a ni dawn.

State Election Commission hotute hnen atanga thu dawn danin VC leh LC inthlang thei tur hian sorkarin an hun pawh tawi a puan hma atang tawh khan electoral roll hi buatsaih chhoh a ni tawh a. Tunah hian a hmawr bawka tep tawhin Nilaini khian inthlanna atana hman theih turin tihchhuah (final publication) a ni dawn a ni. Electoral roll peihfel a nih hnu hian VC leh LC inthlan hi puan thuai a nih rin a ni a. VC inthlanah hian autonomous district council huam chhunga VC-te tel lovin Mizoram pumah inthlan buatsaih a ni dawn a. VC leh LC inthlan inbuatsaih dan leh an inpuahchah tawh chin chungchangah state election commission chuan district tin bawrhshapte biakhmuhtheih hmangin a lo sawipui tawh bawka a ni.

Puan tawh thin angin tun VC hun hi kumin August thla chawhnu thleng a nih lai-in sorkar chuan a pawh tawisak a, February ni 19 a an hun hi tawp turin November ni 20 khan local administration department (LAD chuan hriattirna a chhuah a.

**Thla 6 zeta VC hun pawh tawi hi eptu party-te leh The All Mizoram Village Council Association (AMVCA) chuan an dodal a, AMVCA phei chuan Gauhati High Court-ah khinna an thehltut a ni.**

**Tun hnai a VC thar siamte tiam lovin kum 2020 a VC inthlanah khan VC 533 a awm a, tunah chuan siam tharte nen a vai a inthlan buatsaih a ni dawn a. LC hun kal mek pawh tawi chungchang hriattirna hi thla hlui mai khan UD&PA department chuan a tichhuak ve leh a ni.**

<><><>

#### **MEAT PROCESSING PLANT**

**Bungbanga, Zemabawka Pork & Poultry Processing Plant chu tangkai taka hman theih turin buatsaih mek a nih thu MIFCO chairman chuan a sawi.**

**MIFCO Chairman Pu Lalthazuala Rawite chuan Inrinni khan sa sawngbawlna tur hmun buatsaih mek hi a hmunah flawhin, tun atanga hun rei loteah Arsa leh Vawksa sawngbawlna hmun hi hman theihin peih a ni dawn a, mipuiten sa thianghlim ei tur an nei thuai dawn a ni, a ti. Pu Lalthazuala Rawite chuan, kum 2008 khan he hmun hi hman theih turin hawn a lo ni tawh a, sawrkar hmasate khan eng harsatna nge an neih a hriatpui lova amaherawhchu vawiin thlengin an la hmang lo, a ni a ti a. Pu Lalthanzuala chuan tun sawrkar chuan tangkai taka hman an tum thu leh tunah hian a building leh khawl chhe lai te siam thain thawmthat ngaite thawmthat mek a ni a, rei loteah peihfel a nih tur thu a sawi a. Tunah rih chuan vawksa sawngbawl a ni phawt ang a, arsa leh bawngsate pawh hmalak theihna awm ang ang dap chhoh zel tum a ni.**

**Sorkar chuan MIFCO dinchhuah na'n he sa sawngbawlna hmun hi hman a tum a, ram mipuiten an la chhawr dawn chauh a ni a ti a. Chhingchhip-a thei sawrna hmun pawh thum tha-in an sawr mek tawh niin a sawi bawk a. Pork & Poultry Processing Plant-ah hian sa thianghlim chauh buaipui a ni dawn a, mithiamte'n an lo endik vek zel dawn tih a sawi a ni.**

<><><>

#### **AIR NEWS ON SOCIAL MEDIA**

**Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.**

**Vawiin chawhnu dar 2 leh a chanve-ah Chanchinthar hi puan leh a ni ang.**

<><><>

#### **PM MODI TO INAUGURATE AND LAY FOUNDATION STONE OF VARIOUS RAILWAY PROJECTS**

**Vawiin hian Prime Minister Narendra Modi-a chuan biakhmuhtheihna hmangin railway project chi hrang hrang a hawng dawn a, hna thawh lehzal tur lungphum a phum bawk ang.**

**Prime Minister hian Jammu biala inkahpawhna tihmasawna tur Jammu Railway Division thar a hawng dawn a, Telangana-a Charlapalli New Terminal Station a hawng bawk ang. East Coast Railway-a Rayagada Railway Division Building thar sakna tur lungphum a phum bawk ang.**

Jammu Railway Division hi hun rei tak ata tawh Jammu and Kashmir leh a chhehvel mipuiten an nghahfak a ni a, he rel kawng thui zawng hi kilometer 742 leh meter 1 a ni.

Rel chawlh hmun Charlapalli New Terminal Station hi cheng Vbch 413 senga sak a ni a, Secunderabad, Hyderabad leh Kacheguda-ten an chhawr hle dawn a ni. Rayagada Railway Division Building thar sak tur hi Odisha, Andhra Pradesh leh an chheh vela mite inkalpawhna tihawlsamna tur a ni bawk a ni.

<><><>

**CSIR HAS DEVELOPED INDIGENOUS TECHNOLOGY TO PRODUCE PARACETAMOL**

Science and Technology Minister Dr. Jitendra Singh-a chuan Council of Scientific and Industrial Research-CSIR-in India tualchhuak thiamna hmanga nachhawka leh khawsik tihnepna damdawi Paracetamol an siam tur thu a puang.

Nimina New Delhi-a Department of Scientific and Industrial Research-in an din champha phak an lawmnaah Dr. Jitendra Singh-a chuan, he thil hi paracetamol siamchhuah kawnga India intodelhtirtu tur leh he damdawi siamna hmanrua ram dang atanga lakluh tihlemna tur a nih thu a sawi.

Dr Singh-a hian India chuan ama kutkawih liau liauva bacteria hrik beihletna Antibiotic - Nafithromycin a lo siamchhuah tawh thu a sawi bawk.

<><><>

**US PRESIDENT BIDEN AWARDS PRESIDENTIAL MEDAL OF FREEDOM TO 19 INDIVIDUALS, INCLUDING HILLARY CLINTON & LIONEL MESSI**

US President Joe Biden-a chuan kawng hrang hranga America leh khawvel tana mi thawh-hlawk chungchuang mi 19 hnenah chawimawina “Presidential Medal of Freedom” chu ninin khan White House-ah a hlan.

Medal dawngtu zingah hian America President hlui Bill Clinton-a nupui, US Secretary of State lo ni tawh Hillary Clinton te, Football thiam Lionel Messi te, hranghlui Basketball khel thiam Earvin “Magic” Johnson te, silfen duangtu Ralph Lauren leh sum peipunna lama mi hausa leh chal lang George Soros-te an tel a ni.

Presidential Medal of Freedom hi US-a civil mite chawimawina sang ber, mimal hnenah pek thin a ni.

<><><>